



JUDICIAL SYSTEM MONITORING PROGRAMME

PROGRAMA DE MONITORIZAÇÃO DO SISTEMA JUDICIAL

Komunikadu imprensa

26 Fevereiro 2014

Parlamentu apresia Semináriu Nasionál JSMP kona-ba Demokrasia no Partisipasaun Públiku iha Prosesu Halo Lei

Iha 25 Fevereiro 2014 Parlamentu Nasionál liuhosi plenaria manifesta sira nia apresiasaun ba Semináriu Nasionál ne'ebé organiza hosi *Judicial System Monitoring Programme* (JSMP) kona-ba Demokrasia no Partisipasaun Públiku iha Prosesu halo lei, iha Delta Nova Dili foin lalais ne'e.

Xefe Bankada CNRT Deputadu **Natalino dos Santos** liuhosi nia deklarasaun iha plenaria katak, semináriu nasionál ne'ebé JSMP organiza ne'e di'ak no importante tanba bele konvida xefe suku sira balun hosi Dili no distritu balun hodi koalia kona-ba problema rai ka asuntu rai iha sira nia bairo, aldeia no sira nia suku. Tanba ne'e nia husu ba meja parlamentu atu konsidera asuntu ne'e hodi komesa hare ba Proposta Pakote Lei ba Rai no sei bele hahu halo diskusaun.

“JSMP haksolok tanba hetan apresiasaun hosi membru deputadu sira liu-liu tanba konsidera atividade semináriu nasionál ne'ebé JSMP organiza, mesmu nune'e JSMP ekonraza PN atu konsidera preokupasaun públiku relasiona ho asuntu sira ne'ebé apresenta no diskuti durante semináriu ne'e. Partikularmente, JSMP rekomenda ba PN atu ezerse sira nia kompetensia konstitusionál obriga membru governu atu kumpri sira nia obrigasaun hodi hatan ba preokupasaun hirak ne'ebé autóridade sira hato'o durante semináriu ne'e,” dehan Luis de Oliveira Sampaio Diretór Ezekutivu JSMP.

Antes ne'e, iha 20 Fevereiro 2014, JSMP organiza Semináriu Nasionál kona-ba Demokrasia no Partisipasaun Públiku iha Prosesu Halo Lei, iha Delta Nova, Komoro-Dili.

Iha semináriu nasionál ne'e, representante autóridade lokal sira ne'ebé mai husi distritu neen hanesan: Baucau, Same, Ainaro, Ermera, Liquica no Dili, kontinua apresenta situasaun atual sira kona-ba kestaun fiskalizasaun ne'e la too ba área rural, alterasaun ba Lei Pensaun Vitalisia, reagenda fali Projeitu Lei Reparasaun no Institutu ba Memoria Públiku ne'ebé kaduka iha PN, infraestrutura (asesu ba estrada), projeitu la iha kuaidade, edukasaun (livru ba eskola), no asesu ba servisu saúde (propoin atu loke sentru partus iha área rural ba sira ne'ebé hela dok husi sentru saúde).

Alende ne'e partisipante sira kuaze maioria preokupa kona-ba asuntu disputa rai iha comunidade no husu PN atu aselera lalais Proposta Lei ba Rai. Mesmu konsidera importánsia husi proposta lei ne'e, maibe husu ba PN atu loke diskusaun públiku ne'ebé klean no tempu adekuaudu atu asegura katak lei ne'e refléta ka han-malu realidade sosial no kulturál Timor nian. Sira lamenta tanba antes ne'e governu halo ona konsultasaun ba xefe suku sira maibe mekanismu ne'e ses dok

husi kapasidade xefe suku sira atu partisipa tanba fahe deit liu husi kopia elektronika ho forma (CD).

Iha parte seluk partisipantes balun lamenta teb-tebes tanba tinan-tinan estadu gasta osan milaun bar-barak maibe sira la sente buat ruma husi osan ne'ebé estadu gasta ona. Estrada ku'ak kuaze iha teritóriu laran tomak, projeitu hot-hotu la iha planu no koordenasaun di'ak entre ministériu relavante sira.

Iha sesaun resposta deputadu PN ne'ebé representa husi Primeriu Vise-Prezidente PN no Prezidente Komisaun A, hatudu sira nia aprosisaun ne'ebé produtivu teb-tebes através husi sira nia resposta. Sira konfirma katak sira sei konsidera asuntu no preokupasaun hirak ne'e no promete sei halo tuir sira nia kbi'it no sei enkamiña asuntu seluk ba buat ne'ebé partense ba Governu nia kompetensia atu rezolve.

Aleinde ne'e arador seluk husi UNTL (Universidade Nasional Timor Leste) buka atu fasilita komunikasaun entre deputadu sira ho partisipantes relasiona prosesu halo lei no partisipasaun públiku através husi nia aprosimsaun teoritiku, no klarifika dezafiu estrutura sira ne'ebé dalabarak impede partisipasaun públiku iha prosesu ne'e. Enkuantu JSMP aprezena kona-ba progresu no dezafiu sira iha Parlamentu Nasional.

JSMP hein katak mekanismu ne'e bele fasilita di'ak liu interasaun públiku ho deputadu sira no hein katak eventu ne'e sei kontinua iha futuru konta ho partisipasaun membru parlamentu sira inklui xefe suku sira nia prezensa.

Atu hetan informasaun kle'an liután favór kontaktu:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org
info@jsmp.minihub.org
Telefone: 3323883 | 77295795
Website: www.jsmp.tl